

WORD

¹Kaya nga mga kapatid, nakikiusap ako sa inyo alang-alang sa maraming pagkakataong kinaawaan tayo ng Diyos, ibigay ninyo sa kanya ang inyong mga katawan bilang mga handog na buhay, banal at kalugod-lugod sa kanya. Ito ang tunay na pagsamba sa kanya.

²Huwag ninyong tularan ang mga ginagawa ng mga tao sa mundong ito. Hayaan ninyong baguhin kayo ng Diyos sa pamamagitan ng pagbabago ng inyong mga isip, para malaman ninyo ang kalooban ng Diyos—kung ano ang mabuti, ganap, at kalugod-lugod sa kanyang paningin.

Roma 12:1,2

WHAT *What does the Bible say?*

Marami sa mga tao ang hindi binibigyang-pansin ang Bibliya bilang pinagmumulan ng direksyon. Madalas, naaayon ang kanilang pagpapasya sa halaga ng pera nila sa banko o estado ng ekonomiya ng bansa at ang iba naman ay nagtitiwala sa mga kababalaghang pagsasanay o kumukunsulta sa mga guru tulad ng oroskopyo, saykika, at mga tagapamagitan. Gayunman, bakit kailangan nating gawin ang kalooban ng Diyos bilang pangunahing gabay? Papaano ba natin malalaman ang kalooban ng Diyos?

• Ihandog ang sarili sa Diyos.

Kaya nga mga kapatid, nakikiusap ako sa inyo alang-alang sa maraming pagkakataong kinaawaan tayo ng Diyos, ibigay ninyo sa kanya ang inyong mga katawan bilang mga handog na buhay, banal at kalugod-lugod sa kanya. Ito ang tunay na pagsamba sa kanya.

Roma 12:1

Ang pag-aalay ng ating sarili sa Diyos ay nangangahulugan na binibigyan natin Siya ng karapatan na magpasya para sa atin. At kapag mangyayari ito, ang mga bagay ay magaganap ayon sa Kanyang kaparaanan at hindi ayon sa atin. Na ang ibig sabihin, susunod tayo sa mga iniuutos Niya at sumunod sa Kanyang direksyon bilang Panginoon ng ating buhay. Anong katiyakan ang mayroon tayo sa mga talata ng Salita ng Diyos na ibinibigay sa atin na dapat tayong magtiwala sa Kanya (Jeremias 29:11; Juan 10:11)?

• Iwasan ang mga makamundong bagay.

Huwag ninyong tularan ang mga ginagawa ng mga tao sa mundong ito. . . .

Roma 12:2

Mayroon tayong mga nakagawiang pamamaraan ngunit karamihan dito'y hindi naaayon sa pamamaraan ng Diyos. At kahit pupwede naman tayong mamili kung alin ang susundin, mas may dunong pa rin ang piliin ang landas na mapagkakatiwalaan natin. Bakit natin mapagkakatiwalaan ang mga pamamaraan ng Diyos at bakit mas mainam ito kaysa sa paraan ng mundo (Isaias 55:8,9; Lucas 6:46-49)?

• Baguhin ang kaisipan.

Hayaan ninyong baguhin kayo ng Diyos sa pamamagitan ng pagbabago ng inyong mga isip. . . .

Roma 12:2

Sabi ng karamihan, ang pagbabago ay nagsisimula sa loob. At kung magkagayon, bago natin sundin ang kaparaanan ng Diyos, kailangan muna natin ng pagbabago ng kaisipan. Ang ating pag-iisip ay nahubog sa maraming bagay at madalas dinidiktahan ang ating mga galaw at kapasyahan. Kailangan nating baguhin ang ating pag-iisip ayon sa kaparaanan ng Diyos kung nais nating sumunod sa Kanya at sa kalooban Niya. Papaano ba tayo magbabago ng ating mga kaisipan (Juan 17:17)?
